



曼陀羅花室文目二

國朝常州駢體文錄敘

端州披雲樓祀蘇文忠公詩敘

端州除夕同莊君蘊寬聯句詩敘

冰泉唱和集敘

留雲借月庵詞敘

宛鄰擬古詩錄後敘

胎燁集敘

眠琴閣集敘

新輯晉書地理志敘

十六國春秋輯補後敘

送王雪澂觀祭之武昌敘

沈友卿庶常乞假歸娶詩敘

曼目二

廣東武鄉試題名錄敘

廣雅尙書六十壽頌

廣州三君祠碑銘

開平縣新建鳳山書院記

莊母壽諉室記

岳孝女贊

馮烈婦述

湯伯珩先生傳


伍君家傳

祭朱鼎甫侍御文

祭呂太學文

與王雪澂太守牋

端州觀風教



國朝常州駢體文錄敘

吾郡襟江帶湖居四達之地山水靈淑文物清美自某里  
開端委之俗延陵觀禮樂之風弦歌洋洋聲教漸被厥後  
孫吳纂業華嚴著錄雖蘭台謬述不登於廣內茂陵函臺  
已佚於人間而輯方志者必舉爲別集之冠蓋源流若斯  
其長也永嘉南度藻采尤盛蕭氏父子世擅文學昭明詮  
次總集哀成鉅觀上該兩京下掩六代家握荆璧人懷隋  
珠瑰耀發於川嶽涵茹富於罍藪陶鑄英流模範藝苑匪  
獨商榷眾制潤色鴻業而已有唐代興厥緒未墜穎士才  
子騁俊譽於梁園綺莊詞人騰逸韻於霸府宋元而後派  
別遂多然吾郡駢儷一體溯自開皇訖乎勝國歷載綿邈  
嗣音寂寥學者如牛毛成者如麟角求其典裁清拔蔚爲  
辭宗者殆亦卒渺我

曼文二

一

朝右文碩彥騰起或天才豔發助孝穆之筆札或風諭雍  
容規孟堅之賦頌英絕領袖大雅宗仰亦越乾嘉體凡數  
變卷施之文擷映於南北二史步趨齊梁而平津博麗好  
子雲之湛思此一變也蘭石之文儼豔於初唐四傑陵轅  
江鮑而薦善雅澹有蔚宗之遠致此又一變也鳳臺之文  
祖述張蔡樹骨先秦茗柯之文憲章屈宋胎息兩漢此又  
一變也昔蕭子顯有言文無新變不能代雄凡此數子體  
製各殊繆不傷華雋不傷雅皆文章之冠冕述作之楷模  
猶慮承學之士矜其篆刻飾其鞞帨譬射之失正鵠御之  
傷芟駕也李先生申耆張先生阜文迺各鈔駢賦勒成一  
編被之藝林家藏其本所以暉麗萬有照燭三才扇先哲

之清芬樹後生之準的頡頏蕭選若駉靳焉於是橫舍響  
應才峻鱗集一時瓌奇者流竝奮逸翮抽妍思導清原振  
芳塵海內譚士翕然同稱蓋二百年如一日矣咸同之間  
吾郡被兵庾信羈旅愴搖落於江關陶潛隱居憫亂離於  
井邑文獻將替風流稍衰然一二作者猶能拔奇前修垂  
範來葉飛翰騁藻斐然可觀斯亦霑被者深故流傳者遠  
也曩在鄉邦卽雅意蒐輯恂恂未逮怒焉於懷比因校經  
之暇與同郡諸賢咨訪故籍軫耆舊之凋喪懼遺文之散  
佚迺復發篋陳陳帙研鉛削槩遇有采獲輒加甄錄敬山孝  
廉編校旣審里鄰同志樂勸厥成各分奉金用付刷氏雖  
不敢謂上擬蕭選而別裁雅俗則猶李先生駢鈔張先生  
賦鈔志也夫中郎告逝虎賁之貌僅存叔夜云祖廣陵之  
散將絕幸有文字猶畱典刑然太元著經竟成覆瓿之用  
墓紳纜宿不傳鑿楹之書或巨帙盈尺飽供蠶餐或高文  
碎金消等螢燭是則不朽盛業尙待於闡揚孤行單辭必  
資於補拾纂錄之事其可忽歟抑吾郡誠文志乘簡略瓌  
篇麗製百不一存所冀來者躋續成集庶可倘延閣之采  
副名山之藏云爾

端州披雲樓祀蘇文忠公詩敘

己丑十月予擊楫東溟解裝南園莊子滄曙喻嶺踵至開  
赫詔之徑望故人而忽來過虞翻之居得知己而無恨其  
後滄曙遊韶之樂瀧予畱廣州經歲不相見比至端州校  
文而滄曙亦枉典牋記床重聯乎風雨解近接乎東西譚  
每申旦圍雁足之一檠舞當中宵聽雞聲之二跚郡齋西  
偏灌木蕭瑟有虞翼然廟曰披雲列岫斜敞散瑤星而落  
巖崇臺俯瞰懸寶月而窺牖平湖環其襟帶高峽簪其屏  
嶂百神會觴之室六祖飛錫之剎靡不供此遠矚盪茲奇  
壤月維嘉平十有九日故宋端明殿學士禮部尙書蘇文  
忠公覽揆之辰因覩壁間鐫公送李孝博奉使嶺表詩遺  
蹟乃爲位而祀之禮也當公之謫嶺表也肇鮮荔而飽啖  
負大瓢以行歌居蠻貊之窟瘴厲交侵結桃榔之庵曹騰  
欲睡五更之鐘輕打一晌之夢忽醒雖惠循再貶瓊儋三  
徙而高寒水調之句帝鑒其忠元祐黨籍之碑人觀其過  
別墅二子旣執禮之甚恭祠堂三賢且尸祝之不朽昔昌  
黎刺潮文傳鱷溪之檄子厚祀柳曲奏羅池之歌軌轍雖  
殊其揆一已端州非公宦歷之地而翰札所寄精英式憑  
大書深刻光燭於奎垣文采風流輝映乎嶺嶠淋漓肇窠  
之字髣髴笠屐之圖袍笏而拜將呼之曰丈人縞衣相從  
或導之以羽容團月宜試泉烹參寥孤雲與飛笛按李委  
薦一盞之秋菊陳四筵之黃蕉神之格思期乘風而來下  
會且歸矣傲聚星而聯吟焉嗟乎落落千載微古人其誰  
歸悠悠百年學我輩之相識而乃逸翮同緞豪情共銷孔  
翠斂采待謝籠樊之棲爰居避風甯悅鐘鼓之饗視公瘴  
微流寓炎荒播遷直聲冠於中朝亮節標於列嶽警猶藩

籬斤鷄睚大鵬之筆霄勃解凡鱗景神虬之燭漢雖不能  
至心竊嚮往之爰次公韻紀之以詩香火緣在聊證靈山  
之盟雪泥印畱用賡過嶺之句光緒庚寅涂月

曼文一

四

端州除夕同莊君滄曙蘊寬聯句詩敘

駸駸歲徂惻惻寒薄殘臘向盡餞於茲辰井閭未歸羈此  
異縣形影相附有同駢蛩歡歌自聞或肖鰲鶴子與滄曙  
投分旣深嶺雲合離沙鳥聚散浪柶言邁忽焉滯留清樽  
笑開藉慰孤寄闌景重駐墜歡載尋暉暉之日挽其西馳  
滔滔之水停彼東逝暑短膏繼更長漏遲穆醴味澹飲醅  
而甘桓箏響淒捶筆亦韻一室譁喙四筵瘖舊溫嶠行酒  
氣成虹霓禰衡解衣聲出金石夷甫自雋次公何在玉斝  
輒隄盧非不能千鍾常醒爵且無算幕天席地吐風納雲  
餘子侍側螺贏螟蛉羣公竦觀鸚雀鴻鶴曲讌纔輟高吟  
欸騫句聯孟郊詩奪賈島競病韵險推敲字艱刻之以爛  
催之以鉢石鼎茶熟頻燒松明水盆燈張寢地芑跋嗟乎  
椒頌猶昔桃符忽新循陔眷滋陟配悼折夔之教哀君  
少孤封鮮之誠痛我無母同慨飄宕各嗟遠游吹沫魚勞  
繞枝鵲倦飛騰暮景負茲流光爛醉生涯銷此奇氣矧夫  
草堂貲乏卜鄰何期黍園趣疏玩世不偶斷蓬屢轉叢桂  
聊淹仲翔注易且依訶林孔璋裁賤還典記室江樹南北  
海萍東西延津之劍神物斃并博山之鑪雙煙烟隔今幸  
雪鶴五禽雲龍爭馳柏梁舊製倘追嚴徐松陵清謳方紹  
皮陸軌蹟云合襟情不殊旣忻解帶敢辭授簡綴而敘之  
述羈緒焉

冰泉倡和集序

出蒼梧城東二里許有冰井焉唐容管經略使元公次山之所銘也粵西地值炎微星躔火維陽烏曜芒金石被其消鑠燭龍銜采山川增其輝曠寒泉易涸魚尾頰而若燒斷登全荒牛角礪而猶熱射鮒誰喋語蟲自驚靈源所通燠壤斯改一勺之水滌心神而不煩半規之渠鑿毛髮而亦疎味澹而彌旨氣清而愈虛甘醴慙其締交影纓濯其塵垢脩綆堪汲不聞勞者之歌美樾可依無待嗇人之扇洵神州之宛淵福地之寶液也時代屢更路石久佚覽古者惜焉金丈鞋生同轉監離此邦簿領多暇爰尋都嶠之榻復築漫泉之亭琴尊迭開嘯詠無廢題襟同於漢上飲禊比於洛中益簪朋集因結雲霞之交投轄賓畱未銷湖海之氣倡酬相繼篇什遂多昔次山錄王季友孟雲卿輩七人之詩爲篋中集騰川原之逸藻激山水之清音英鷗沈寥嗣響闐絕越千載於茲矣丈抗希曩軌撫念前塵纂此一編貽諸同好元白之流連鏡水皮陸之洞遡松陵東坡集中輒存投贈之作南岳道上爭寫紀游之詩譬諸豐山之鐘應清霜而奏節延津之劍淬赤瑾而呈鉞可謂相得益彰竝傳不朽者矣翊寅僵逾冷蠹啖等寒蟬炎洲瘴海之地過嶺來遊讓水廉泉之鄉買磷待隱猥承授簡謬預校文攜冰雪於袖中擘雲煙於紙上蘿薜在眼已簪組之久忘蘭若相鮮况藻采之俱發他日碑折萬本吟聯八义葦陽眞逸重摹陸鶴之銘桂管壯遊更讀驂鸞之集



畱雲俗月盒詞敘

蒙夙弄柔翰頗耽倚聲辭發偏宕體成側豔弱冠而後飢  
驅出遊落騶鄱湖鳴柁嚴灘眺雲匡廬之頂蹋雪台蕩之  
顛烏篷往來與野驅以其泊芒屨登陟呼嶺巖而爲羣羈  
緒騷情皆寓之於詞雖悔其雕蟲作輒焚弃然翫悅彌篤  
未嘗屏油素輟鉛槧也歲在癸未自里閭之武林與語石  
山人同泛輕舸凜梁谿惠麓之勝山人固工於詞者相與  
蹋辭尋烟煎茶調水菊晴漪而洗眼滄飛瀑以盪胷賸韻  
拈豪聯陰刻燭投贈之闕猶存乎篋中倡酬之篇迺出乎  
塵表麾手一別雙心十年山人客西冷最久蒙亦浪迹四  
明每渡錢唐山人輒招飲湖上以畱雲俗月盒詞彙見示  
已成帙矣吾宗滄綠太守酷嗜山人詞釀資付刊點校纔  
畢太守遂歸道山黃鱸重過周鄰遂而含悽淥水再彈拊  
爨琴而屑游誦中酒殘花之句誰賞張先廣滿城飛絮之  
吟自憐賀鑄蓋太守歿後山人亦勸游去溯畱寓金閨范  
蠡之乘湖船梁鴻之賃皋廡尊鄉鱸美早動秋風之懷桃  
漲鰕肥方饒春水之趣時或莊過寒碧館覓靈巖問劍氣  
於魚腸延波光於鶯脰塞香涇曲望吳苑之錦帆響櫂廊  
空憶越溪之羅袜引商刻羽獻侶命儔擊盃奏其妍辭題  
襟傳其雅集覃學旣久積軸遂多定本刪存都若干首辛  
卯秋九蒙詣白下還里復與山人同舟出前帙屬敘塵事  
牽率遲未有以應也今歲粟香同轉見山人詞促其錢版  
郵書敦迫命題簡端蒙自飄寄喻領索居彭權曉風揚柳  
之岸綺語懺除寒雨枕榔之庵豪情銷歇雖復訶林懷古  
宅弔仲翔羅池送神廟經子厚而紅蘭碧杜罷唱牢愁之  
詞丹荔黃蕉空傳變徵之譜比麝塵而香滅同蠟炬以灰

乾覆後世之醬瓿惟艸太元贖卽時之酒榘并刪小令然  
與山人雲霞結契湖海傾衿話雪鴻之爪印思續前游證  
風雅之心期敢渝宿諾又況疏桐缺月忠愛想其纏綿煙  
柳斜陽憂傷知其顛顛倚翠竹於幽谷睠此塞修采白蘋  
於迴汀愴茲遲暮將編頓倚翠竹於幽谷睠此塞修采白蘋  
抗玉田鞦追石帚繩大晟之定律象黍無差翻中呂之新  
聲豪芒不爽以清空婉約爲主以溫柔敦厚爲宗尤非雕  
琢曼辭者所能窺其眇惜也已

擬古詩錄後敘

右宛鄰張先生琦擬古詩三十首賢子仲遠先生曜孫依擬三十首又續擬一百首都爲三卷擬古詩者卽擬所錄之古詩也吾郡乾嘉以前言詩者多宗盛唐獨宛鄰錄自漢迄隋凡古詩百七十一家導其源流窮其正變而爲之敘大要歸於思必沉絕言必麗則抗墜以爲音頓挫以爲節務有以達其芬芳惟惻之辭宣其纏綿鬱積之情以蘄合乎溫柔敦厚之敘由是聲出金石氣成虹霓上規風雅同符屈宋使百世之下聞者莫不感發而詩之道尊故自古詩錄行吾郡詩派爲之特變擬古一體權輿建安薤露蒿里及善哉行皆樂府舊題魏氏代漢厥風益鬯子建揚金鑣於前孔璋馳玉軼於後元瑜詠史嗣宗咏懷並其選也晉則陸機陶潛咸擅斯製宋南平王鑠鮑叅軍照袁太尉淑各有所造或曰當或曰代或曰效或曰學皆擬古之作至梁簡文帝戲防惠連復樞沈約體雖非古間亦擬之江淹歐阮公詩贈建平王主文諷諫不求形似唯雜體三十首氣調各殊神貌俱肖宛鄰以爲宛其微指亦述懷之作亮哉此言洵千載之導師矣其後范雲何遜庾信王褒張正見狹邪之行陰子堅婕妤之怨唯觀異曲罕聞同工蓋推醴陵稱極詣焉宛鄰父子於詩原本三百篇以比興爲宗旨饜飶漢魏而殖其柢沉浸齊梁而揚其葩所著擬古各三十首骨掩明遠體規文通條流無乖曩軌若接宛鄰自言抗古觀尙俾遠亦謂以託興而寄意儷切情事殆非偶然又續擬百首眾體畢該自漢迄隋一依前錄究其微指蓋皆述懷之作也世俗每嘗擬古爲優孟衣冠豈知情不稱辭辭不副情雖自出機軸何關品藻卽或雕琢章

句揣摩音響以悅庸眾之耳目而思非沈絕言之麗則使  
聞者無所感發亦靡當於騷雅之誼宛鄰父子擬古詩不  
啻自述所懷辭則芬芳而悱惻也情則纏絲而鬱積也所  
謂比物龍鸞連類蓀莖者是乎在世俗於唐以前詩曾  
未涉其藩籬窺其窾奧而顧持此相詬病豈達論哉吾郡  
張氏以詩名家宛鄰集已鈔版燬於兵火仲遠先生詩若  
千卷陽湖莊氏寫稿藏之今校錄擬古詩三卷附古詩錄  
後庶使覽者知涂逕得津梁焉光緒二十年夏五月

蕊昔河洲思賢爰哀窈窕江沱襄滕用發歡歌歸妹以娣  
繇賡其被良靜女其姝詩懌其管美祁祁盈門之從肅肅  
抱凋之征三人緩帶鬻子之勤勿渝五月練冠慈母之紀  
彌篤類皆彤諸篇咏載在禮經扇馥圭幃揚徽典策自彤  
史編佚不詳內壺之型班書纂成未輯中壘之傳金環徒  
繚其進御玉佩獨闕其將翔疇紡績以待家罕幙帷而協  
夢或且擇媵媵之穉齒寵以專房矜嬈娟之脩眉藏之列  
屋釵鑷十具賜阿杜而何榮珍珠百琲酬季倫而匪貴豈  
能垂大家女誠作孺子母儀襄筵屈節遂爲方雅之宗織  
蒲服勞僉稱賢明之婦若邁名鐫茗琬度覬蔥珩副笄六  
珈宜委佗之象服嚴妝三鏡亞興慶之班行固由 帝眷  
之隆抑亦家修之穆曜厥禕冊詎曰非宜詒燁集者侍郎

許公爲倅室梁夫人哀錄志銘之文與哀誄之作也夫人  
珠生合浦籍系仙城木蘭之父名隸軍書羽林之兒幼銜  
家卹緹縈裁戕沒身以瞻母絡秀治饌截髡以款賓雖同  
曙後之孤雅異泥中之辱非歲依南豐趙廉使家其冢婦  
視若己子鍾離之激高義具辦盛匱蔡邕之賦慧姿能裁  
中饋年十八歸我奉新許公蕙郁檀馨冰清玉暎宛林下  
之風氣承堂前之起居祥女人門媪御皆賀碩人在室姬  
姜益莊侍櫺之暇弋紉而卻鉛膏漱裳之餘椎髻而提汲  
舊家牒所錄闡劇綦詳觀其芝園協趣蘅閣棲神鹿車手  
輓儷少君之蹤鴻梭肩隨圖列女之像述戴媪之惠問符  
茲塞淵稱班好之令儀媿此嘉淑蓋嘗綜懿熾攄清芬而  
知夫人四德咸備二難允兼惜惜乎有雅範落落乎有風  
標者焉夫親舍雲隔輿陟屺之謠使車馳馳鼓循陔之養

昔之人煇爛采服效嬰兒而自嬉滌濯中踰因休沐而私  
謁靡勿磐桓家巷眷戀闕廷公則畫簞頰持皇華載咏初  
典黔中之試復揚塞外之旌度九折坂叱馭而神飛乘一  
封軺趨庭而寢阻違侍則忍曠官非忠斬兩節之並宏賴  
二賢之交贊夫人魚軒罷御翟茀偕歸青葙押佃隨健婦  
以持門華黍吹笙侍女君而潔膳公得巡行闕輔按部雍  
涼校官弟子颯颯而聞弦歌橫舍生徒莘莘而執俎豆烽  
銷復窟劔脫虎賁 聖書褒美聲教被於邊陲裋鼎承歡  
寵光溢於閩里兕觥共酌鳩杖同扶是曰竺其德一也  
穆木曲逮螽虺恒衍其祥荔支側挺燕姑屢徵其夢芣苢  
之歌采頽瞻彼道旁藻蘋之咏尸齋奠諸牖下名偶區乎  
嫡庶諠何判乎親疏然毛裏之恩必厚於已出乳哺之愛  
唯恃於所生甚或論瘦爭肥憎長毀短箕帚騰其詆誅衷  
梁損其權喻子弟何預玉樹靈馨之兒丈夫猶憐金鑿嬌  
小之女人左挈右抱前襟後裾弄璋有慶繡文葆而擊  
媿設帆無驚鳴佩環而婉孌女師德象母氏賢勞旣撫字  
之益隆亦恩養之加篤半臂易麪作湯餅而開筵雙鬢上  
鈿微布裳而遣嫁鳴鳩均壹誦威儀黼黻之篇鳳凰于飛  
叶和聲鏘鏘之筮慰情良勝調護有功是曰純慈其德二  
也夫揚施蜚襪則巾櫛非所任被羅曳縠則井杵非所操  
是以中山孺子巧笑傾城北方佳人獨立遺世署掌書爲  
記室五朶雲霞望修史若神仙兩行椽燭嬪御之選鉛華  
所宗況乃履石斯卑入宮見妒掩袖擁髻惟媚俗元長柄  
短轆或譏玉導開幃則恐傷盛德辭輦則懼割故歡迴文  
織錦多怨悔之詞匿扇裁紈有棄捐之歎夫人施禪致敬  
傅粉受和屏扶風珍麗之裝慕德曜隱居之服射親禦臣

繆勺藥之羹湯手捧槃匱馨如蘭之脩灑禮法嫻於鍾郝  
箴誨習於張斐至如量水稱藥徧謁夫三醫陟工采蟲卒  
瘠其四體恒灸艾以分痛逐樹萱以忘憂宜其鳴琴在御  
君臣之弦俱調纜筭而朝室家之壺不忒祭祭門子推赤  
芾之榮溫溫恭人泯綠衣之僭是日執禮其德三也母以  
子貴誼著於春秋婦從夫尊秩詳於官禮公孤則揄狄屈  
狄卿士則鞠衣展衣若乃縣君版授縹裝懸玉軸之封  
宸極綸頒雕幃拜金泥之敕未有旣膺章服仍滌故裳爲  
締爲裕辭珠黻之華佩吮佩盼卻鑑鑿之寵夫人媿媿善  
下芘芘考祥明星有嘽鴛杼仍鳴替月無嫌爵釵不御時  
隨公開藩江左建節河東待漏晨參求衣夕室筥中雲爛  
緘五色之仙袞曠外春寒屏七襄之麗錦染繒自曳衣帛  
靡聞正嫡徐夫人因推覃恩命易冠帔秉分卑抑陳讓再  
三湯沐之俸屢加闔門之儀彌肅迨至鏡鸞罷舞笙鶴爭  
迎紫綬金章不覩姝而祓服文軒丹轂唯備禮以飾終是  
日搗謙其德四也公起家翰林歷位開府鳴笳而度秦隴  
縮轂而領河隄投戈講藝張吾道之干城湛玉拳芟屹中  
流之砥柱傳箭降回紇之部漏卮覈水衡之錢斥埃濺靜  
薦夷歌於白狼宣房福祿第嘉頌於朱鴈固已勳書太史  
位踐台司蹇蹇歎其匪躬觥觥欽其令望夫人深窺蓋慮  
密贊英謀炊屨惜別豈奏援琴之謳解組思歸永懷投舂  
之趣銀手如斷玉聲有常艱阻無避靖獻其忠規寵榮不  
耽夙敦其雅尙劬盡瘁以事國勛持盈以保家長卿喻父  
老之檄負弩前驅疏廣憶先人之廬賜金早散佩良箴於  
邦媛攀逸軌於曩賢是日曠識斯一難矣公服膺儒素提  
唱勝流膏馥散乎藝林瓣香傳乎師範在江寧時出官俸

葺文正書院圍基賄墅登太傅之樓敷衽橫經立次宗之  
學至於梁園賓榻儉府朋簪座揖鄒枚游招楮呂霏玉塵  
之後辯騁碧雞之瓊辭邸舍寒積每詣人而脫襦衙齋夜  
闌常畱容以投轄夫人供設漿酒料量米鹽厨下異饌有  
五侯之鯖篋中長物無六尺之簞鄉家同其豐儉族鄙其  
其饑寒蠶妾十指課成都舊栽之桑木奴千頭嗤武陵新  
種之橘在官則惟飲吳水遺子則豈待越裝陋濬沖之錮  
疾乃在膏肓陪夷甫之清譚不言阿堵是日端操斯二難  
矣夫以醴粹之衷內蘊其犖性孤奇之槩外褻其修名固  
賢媛所罕儔尤雋流所景仰謂當追周伯仁之親匹陶士  
行之母輝映情史蔚爲禮宗胡吳穹之靡諶迺中壽而忽  
靳制瓊瑰之淚遽夢盈懷畱曉嗷之暉旋悲匿曜宜公之  
拂簞纏哽望廬軫悽撫錦瑟之弦柱輒思華年檢玉臺之

咏題重萊別集辭航希逸爭詠德於素常筆道中郎代詒  
神於貞石豈獨黃門哀逝賦悼良嬾齋白受辛碑鐫幼婦  
而已哉翊寅曩客京邸友人劉君可毅述公雅命徵及鄙  
文嗣頃忝預校讐復相敦促敬辭不獲竊維公典藩建業  
遺愛在民過雞鳴之埭勝蹟流連頰鹿洞之規譽髦翁集  
重展茲帙益用憬然嗟乎樊姬進賢不聞獎汲寒畯班惠  
續史未暇恢崇儒林豈圖閨帷垂意學校勸公以養士勉  
公以培才使青衿之徒戒其佻達白屋之彥爭自濯磨非  
唯宏此遠謨抑且慰彼黎庶讚助多益亮爲美譚若迺挾  
藻雲屬雕章霞舒情文相生儷匹增重孫楚除服覩茲不  
朽之篇王珣敘哀慙乏如椽之筆謹取卓犖大節表諸簡  
岌庶發潛而闡幽冀廟鈍而礪俗云爾



眠琴閣集敘

嘔自王迹旣熄頌聲斯亡霸圖云徂騷辨豳然而小雅  
怨誹本敦厚溫柔之遺大招牢愁多幽憂放逐之作前徽  
未沫來軫方道流別雖殊嗣音勿替泊乎建安播遷應劉  
振其逸響典午離亂顏謝揚其芳塵蓋世變則情鬱而旨  
悲詩難則志憤而音激詩人之遇窮然後工六朝以還四  
傑齊軌至迺渭城微雨歎王維爲詞宗汾水秋風呼李嶠  
爲才子夜郎長流有謫仙之目秋興諸咏負雄伯之稱綜  
觀昔賢恒覲奇賞未有聲華闐宋品藻銷沈章甫適越語  
習乎侏脩曳裾遊梁身投乎瘴癘太璞捐而泥塗辱黃鐘  
棄而瓦釜鳴如澤山舍人之失職者也澤山標致誕逸襟  
抱靈奇抗氣岸則青霞比高淬神鋒則白雪方潔遺落世  
事流連古歡獨於文章者好尤篤幼受詩法於外祖衍后  
給諫及舅氏徐山先生每出新裁輒驚老宿王郎之似袁  
粲肖其矜嚴陸杲之類張融追彼風格譚攜塵尾炙割牛  
心載酒過子雲之亭浣花賃老杜之宅先世宦蜀有閣曰  
眠琴爨桐三弄出峽龍吟脩竹二分在陰鶴和其後僑寓  
轉徙積十餘載故集中入蜀詩爲多甲申歲客長白繼公  
幕鎮木蘭移廣州聲諸競病喧都護之饒歌謔憶姬唄效  
參軍之蠻語其間道晉豫走燕齊西歷秦楚東游吳越皆  
有撰述以紀其行起庚午訖甲午凡得詩若干首詞若干  
閱刪定成帙校寫付槧以余久契心期猶知比興督使爲  
敘敢辭不文昔劉孝標比跡敬通自序稱三同四異余與  
澤山竹柏相悅苔岑共滋與雪鶴以唱酬爲雲龍而馳逐  
平生同異可略言焉澤山早飲香名夙敦雅尚謝靈運蕭  
散直上好爲山水之遊王夷甫清峙眾中自出風塵之表

軒冕不以屑意鼎鐘不以經懷班固之荅賓戲亦元亦儒  
揚雄之解客嘲唯宋唯冀余志澹榮利才疏獻謝魚相忘  
於江湖鷗自狎於滄海看山則致有爽氣漱石則殊無宦  
情胸多壘塊須縱酒以常澆趣得琴徽不張絃而輒撫等  
嵇康之懶慢成阮籍之猖狂爲時觚排與物鑿枘此一同  
也澤山身閼萬里手麾千金蜀肆典長卿之裘燕臺擊豪  
士之筑鄭莊不聞置驛班超空歎備書囊底則一錢僅存  
懷中則半刺恒滅至迺短衣匹馬弭節白檀之山羌笛明  
駝從軍紫漠之地熱河北眺瘴海南遷長揖之客鄙生見  
嘲遠遊之裝陸賈誰辨余窮途痛哭早歲飢驅呼鷹蜀表  
之臺屠狗荆軻之市帳中草檄星射天狼城上聽笳風吹  
落雁烽暫銷乎四塞船重趁乎五湖旗亭畫壁暗唱龍標  
之詞笠澤尋煙叢編漁樵之曲今且遠辭井里畱滯炎荒

依士巖於南州徙虞翻於北戶木棉巷側嘵隔嶺之鷓鴣  
扶荔灣邊老雙巢之翡翠此一同也澤山奇骨在抱壯心  
不羈負絕塵之姿多濟勝之具嗣頃棲遲蠻府落拓瘴鄉  
疾非類於拘攣病或疑於瘠渴丹砂待覓之句扁之堪求  
藥水稱量無眞長之可累余元髮將槁朱顏易凋異叔竇  
之神清逾仲宣之體弱寒蟬抱葉聲哀露而已噤俊鴉投  
林翩陵霄而先勅恆步履以行散每觀碁而坐忘讀叔夜  
養生之論石髓不逢箋稚川抱朴之篇黃芽空煉此一同  
也澤山廉吏之後故侯之家西華葛帔輕曩昔之貴游南  
阮積禪鄙當時之膺族蔡邕聞而倒屣王混見而傾襟孝  
威孝綽羣從並能屬文元方季方諸兄皆得通籍余衰宗  
零替蔭地單寒江謚豈望於華儕李彪非資於清第羊曇  
隕西州之泪扉策頓搗馬融傳後堂之經帳紗尙隔至於

阿連才悟曇首文章池塘之夢無徵門戶之重誰寄此一異也澤山紬書天祿注牒春官擅雕龍之文心推造鳳之賦手階翻紅藥掌內制於北門省對紫薇追故事於西掖雖未登麟閣之選固將值螭坳之班余三獻屢別十擲輒韃孫宏對策太常擯而不前方朔上書尙方讀而未竟年已傷其遲暮地仍隔乎仙凡高齋抄謄厠學士而何榮秘閣校讐求貲郎而豈得此一異也澤山赤水探珠藍田產玉名兒颺胙得父膏腴戴遠總角便製康成之碑虞寄垂髫何慚文學之對詩則日習九紙賦則早研三都王子師之一流袁君正其有後余貧甚戴碩晚儕商瞿李繪竊贖誰通急就之章揚烏傳經倘預太玄之業眼中惜無此物膝上那得如馨陶家之賁棗栗呵責不聞蔡女之辨琴絃慰情良勝此一異也澤山莩事多能典裁清拔太沖詩有

世表意子虛賦非人間來書則方寸千言畫則咫尺萬里車騎填委觀太學之石經行障坐臥寫蘇門之長嘯若乃樞山範水刻羽引商歌翻壁月宮禁賞其新聲句織弓衣華夷傳其麗製分柶憚之餘技足了十人合王筠之文章都爲一集余幼耽藻翰壯悔雕蟲繡聲悅而未遑焚筆研而猶待寫經則一縑不值摹繪則雙管全枯宜官醉抹之壁削跡無存長康糊題之厨通靈盡化至於覃擘與旨校理祕文千載絕詣供醬瓿而見嗤十年構思覆酒瓮而貽誚呂覽敢懸之市上論衡盜置之帳中敝帚徒珍康瓠豈寶此一異也然而律唱者呂緡知希者賞眞巴鼓瑟而魚聽曠援琴而鶴舞輒窮伯牙之趣聊定敬禮之文夫言爲心聲辭在意表升降緣乎世運盛衰繫於人材近代作者或調工摹擬或語尙性靈體格非古襲優孟之衣冠風流

不尊雜屠沽之婢販煙墨受其驅染風花聽其弄嘲六義  
浸微四聲俱病嗟乎詩之橫流既至斯極詞者小道更無  
可觀雅奏亂以鄭聲淫哇被之樂府叫囂自喜粗豪託於  
蘇辛輕薄相矜側豔過於溫李此則雖有健筆亦莫挽其  
頽波者已澤山韻高致遠緒俗思新文外獨絕王籍若耶  
之篇晚來名家謝貞閑居之作根柢胎乎二漢波瀾訖乎  
三唐景純變體標雋上之才好問長謠挾幽并之氣至或  
緣情綺靡寄興遙深曉風殘月之唱不數屯田疏影暗香  
之吟如聞石帚卽論餘事尤屬雅音昔梁簡文謂文章未  
墜必有英絕領袖之者余於澤山同此欽挹幸無以嶺海  
飄寄戚戚自傷其懷抱也

新輯晉書地理志敘

陽湖方君體博覽多識夙承庭聞於輿地厯算之學靡不綜覈淹貫著書滿家光緒己卯侍其尊人元徵先生駿謨於徐州邸舍成新輯晉書地理志一卷糾謬拾遺辨證翔實典午一朝建置沿革藉可攷見厥功甚偉同時劉君慈民庠亦覃精此書間有商榷益徵完善比客廣州已校刻算術數種此稟寫定未竟而君遽歿傷已昔江醴陵謂史莫難於志而志地理尤難漢代地志創自孟堅聞見既真典籍尤備然象郡之罷不詳置於何時廣宗之封未載隸於何地晉司馬彪踵成郡國前軌可繼疏漏尚多劉昭補之庶幾無闕惟安順以後郡縣分并繁置不書泊乎三方鼎峙疆域相錯僑置遙領禁如亂絲承祚國志未暇整比金行革運吳蜀一家王隱虞預臧榮緒蕭子雲何法盛謝靈運皆譌有晉書歷宋及隋存佚相半唐初史臣奉敕脩纂於地理學最爲不精其間斷限復乖體裁舛午異同難於舉君以沈約州郡魏收地形采擇詳塙足資佐證至於晉世起居太康地道雖次已散逸而說可引徵其見存完帙如元凱左傳之釋善長水經之注晉代沿革首尾具在他若皇甫謐帝王世紀京相璠春秋地名常璩之述華陽郭璞之箋山海王隱地記關駟州志皆一代魁碩習於掌故其所譌著良輯尤勤下逮元和郡縣太平寰宇凡涉方輿間加搜討而輟據唐以前書爲之標準其業可謂閎其識可謂遠矣時粵中方開書局廣蒐乙部獲觀此稟錄以付采翊寅末學舛陋校讀之下偶輟所聞匪敢獻其一得亦以助瑩矚之照云

十六國春秋輯補後敘

自晉政不綱方輿鼎沸攘攷神器僭跨相望又皆起自胡羯非我族類毀裂冠冕荼毒縉紳宗社邱墟生民塗炭豈天心鍾亂運厄陽九故邁其會耶抑人事有以釀成之也夫夷夏之防古今至重要荒委贄義在羈縻自漢魏以來戎狄降者多處之塞內漢光徙先零羌於馮翊魏武徙武都氏於秦川又并州之胡散居六郡晉郭欽疏言百年之後有風塵之警則胡騎三日可至孟津宜以兵威徙之邊地江統亦言宜徙羌出關中氏還隴右五部匈奴申諭發遣歸其本域皆不見錄用是時朝野上下祖尙虛浮白望清談靡然成俗州郡武備旣弛戎政不修梟雄之材乘釁而動固其宜矣劉淵因部眾之推假單于之號控弦數萬首倡逆謀李特父子略陽氏豪扇動流民遂盜巴蜀石勒

羯之餘種苻洪氏之酋長姚萇羌之渠帥迭據關隴雄視中原拓跋索頭之裔稱王於代慕容皝卑之族僭帝於燕惟涼州張氏奉晉正朔終以僻在西陲爲秦所并呂光繼起勢亦不振自餘諸國皆非冠裳夷狄盛則中夏衰又其勢然也蓋嘗究其終始而論之晉武踐祚本由篡竊平吳而後志益驕盈嗣主昏駸不堪負荷受遺顧託又非親賢加以女后專朝台宰尸素八王構難同氣推戈逮乎神州陸沈舊京播蕩王浚土崩於幽薊劉琨瓦解於晉陽耆雋衣冠屈鄒戎虜十州有倒懸之危四海無中興之望琅邪纂承大統假息吳會畫江自守經略未宏桓溫入關三輔響應因小挫輒輒復返旆遂使秦中豪傑翻然改圖王猛尹緯甘爲苻姚佐命而不悔故晉之替非十六國也夷甫諸人固任其責亦由江表將相坐失事機無以收恢復之

效也而論者顧委之於運何哉偏霸之興亦應符讖然皆傳祚不永忽就夷滅蓋任賢則疆懷諫則厯未有嚴刑峻法賦役僭興誅侈大臣猜忌骨肉而能卜世長久寢熾寢昌者明乎逆取昧乎順守斯十六國之所以失耳夫割據之禍歷禩逾百曠覽載籍前古罕聞然覆轍相尋成敗燦列則又哲后之誓龜先民之炯戒而非可昧焉不察者也魏崔鴻十六國春秋百卷敘例一卷年表一卷褒貶得失惜寓勸懲惜宋元間其書已佚明屠氏別撰百卷虛託鴻名雜采小說未足徵信古黟湯伯玕先生潛心著述刺取舊文輯成是編並錄晉書載記列傳及宋魏兩書以補其闕又撰年表一卷冠晉於首經緯秩然十六國先後敘次一依鴻傳正其違繆校其異同遂使散亡之籍頓還舊觀鑿誠以彰興替足覩非僅拾遺訂隆而已夫史兼三長識尤其要謗固不可穢亦非宜本傳稱鴻二世仕江左故不錄僭晉劉勳之書明正統所歸匪在元魏今書於諸方僞號輒繫晉年牋表闕庭不遺一字侵陵則稱入寇敗績亦曰王師筆削之間具存微愆雖非鴻書之舊然約而不窳博而不餘網舉而曰張意內而言外卽謂鴻書至今存可也烏序當晉太康時君相溺於宴安狃於全盛氏羌戎狄雜處中國有履霜墜冰之漸而不知戒同積薪厝火之勢而不知懼一旦禍起遂成橫流內訌外潰不可遏止而承其弊者又或玩寇喪師無撥亂反正之具至使銅駝沒於荆棘鐘簴淪於腥羶國步陵夷卒以不振然則千載而下思患預防可不於是編三復之哉

送王雪澂觀察之武昌敘

側聞當世豪雋識時務者動曰自強夫自強之道豈徒恃  
堅甲利兵遂無敵於天下哉其必朝野上下勵精圖治乾  
乾夕惕不遑暇食然後可激發天下之志氣濯磨天下之  
材能使紀綱釐然粲然萬事不隳壞於冥冥乃能歷  
百年而無微易乾象傳曰天行健君子以自強不息夫天  
穹然蒼然混混淪淪不見其行而有南北二極以爲之輪  
則日月運焉星辰旋焉四維張而八紘振焉君子自強不  
息所以法天即法其行之健而已天行健則地執順天下  
萬國有逆命者皆其上之政令不法乾健遂至執有扞格  
迷亂失道而不順也乾坤之後繼以屯蒙屯象傳曰君子  
以經綸蒙象傳曰君子以果行育德今天下雖治平然君  
子視之則屯且蒙矣海禁旣開異族內犯朝廷政令不能  
行於中國行省之地藩服盡削屢啟兵爭邊徼竟割兼償  
軍費將帥聞風而潰士卒望塵而奔斧鉞不加金縢日緇  
南洋船廠燬於法北洋船塢燬於倭險難在前動輒得咎  
非所謂屯之極乎彖曰屯剛柔始交而難生動乎險中大  
亨貞中外交涉有剛柔始交之象君子則經綸之通其變  
以合乎正出其險以底乎寧此經綸之說也五洲之內機  
械日新中國士農工商皆拘守舊習遂至見絀於異類省  
部試帖括殿廷試楷法體國經野之術無所知阜財辨物  
之方無所攻文謨武烈無所睹地輿天算無所聞則土皆  
廢棄而不可用墾土以耰耨而荒蕪罕闢灌田以桔槔而  
溝澮罕通甚者栽鴛粟於內地受雇傭於外洋逐錐刀輟  
耒耜則農皆惰游而不可用至於藝事則苦而窳駟材則  
欺而貪舟車之牽不若輪船鐵軌能致遠也斧斤之運不



如汽機電器能利用也且泰西之紡織興而女紅奪其業  
製造廣而市販喪其資銀幣作而園府無其權鐵冶開而  
礦人失其職彼則維新我則守舊起視斯民殆蒙之甚君  
子致身事君出身加民當牖其蒙而導以正綜覈名實以  
投其錮蔽講求利病以開其聰明百折而不回一成而不  
易此果行育德之說也今天下耆碩並聚於上乃內自臺  
省外自封圻凡百有司徒峩其冠而博其帶睹斯世斯民  
之泯泯焚焚極屯甚蒙曾不經綸其間卽有深識遠慮者  
倡一議立一政或且阻撓之敗壞之平時粉飾太平委蛇  
養望端居晏息以自暇逸一旦事變猝起旁皇不知所措  
手及境過情遷則又憚焉若忘譬積薪厝火而卧其上竊  
恐履霜堅冰將有龍戰之懼豈軌運竟厄陽九耶蓋二三  
大臣昧自強不息之義未能法天行之健故經綸無所施  
而果行育德之君子見羣小之黷蒙亦括囊求去不思效  
其忠告也南皮尙書居矜喉之任執幹運之柄洞燭時變  
發憤自強始督兩廣改兩湖移兩江憫天下之屯且蒙興  
利除弊百廢俱舉復慮庶務不能獨理也故在粵卽檄公  
自黔來襄厥事昨者江防孔棘旣調公典軍諮今還鎮武  
昌復疏請公由粵之楚豈尙書無意於粵而有私於公哉  
蓋以人事君大臣之量而又稔知公有經綸之具以果行  
育德爲志楚居上流天下形勢所繫爲吳越根本非公相  
助爲理尙書一身政繁且劇雖自強不息無以收拔茅彙  
征之效而贊泰交之治彰乾斷之明也伏承 朝廷下詔  
求賢方懲前愆後渙大號革故常變通因時規畫久遠公  
能體大君天行健之意以佐尙書之自強惟日孜孜集思  
廣益則庶乎可以經綸而果行育德之功亦得藉展所素

蘊使斯世屯而寧斯民蒙而明其有造於天下豈不偉哉  
抑易言否泰之運剝復之幾皆視君子之消息升降爲轉  
移於公之行敢揲著而卜之矣

曼文二

三

沈越若庶常乞假歸娶集敘

古有選舉無科目漢制廷策賢良州察孝廉皆補博士議郎擢諫大夫至唐以帖經及詩賦取士始有新進士之稱或在京秩或改外吏開元初置翰林官曰待詔曰供奉後別置學士院掌內制而翰林之職始重其新進士放榜開宴會於曲江亭既撤饌後移樂泛舟觀者闐溢又有月燈閣打毬之會貴游家因以選婿唐摭言已艷稱之後遂相傳治爲故事南部新書載李翱牧江淮郡有進士盧儲投卷來謁李置几案間長女及笄見文卷尋釋數四謂小青衣曰此人必狀頭李聞乃選爲婿來年果狀元及第纔過殿試卽畢姻作催妝詩云云益發科之美譚聞喜之佳話矣攷之禮男子三十而娶宋富文忠公常謂邵伯溫曰晚娶甚善可保養血氣專意學問吾年二十八登科後方娶

曼文二

三五

先公先夫人時未第後不許娶又宋史稱馮京少雋邁自鄉舉禮部以至廷試皆第一時猶未娶張堯佐方負官掖勢欲妻以女擁至其家束之以金帶並出奩具誇示之京笑不視力辭去又山堂肆攷稱王沂公曾初就殿試時已有感鬻李文靖沉爲相適求婿語夫人曰吾得婿矣乃舉公姓名曰此人今卽不第後亦當爲公輔是時呂文穆蒙正亦求婚於曾曾聞文靖言曰李公知我遂從李氏古人於繫援之際其審慎不苟如此蓋妃匹者人倫之始姻亞者里鄰之型士初釋褐時慕膺任妄意攀附則將爲終身羞文章氣節掃地矣沈越若庶常同芳弱冠膺鄉舉壬辰應禮部試都下選婿者甚眾有某官居要津欲妻以女招之往越若以未擢第辭去甲午成進士座主注卽亭侍郎爲從女弟相攸越若以母太孺人五十初度

廷試後馳歸爲壽未告母不敢應乙未

朝考列高等選入庶常其年八月始乞假成禮館閣前輩及鄉會榜同歲生皆賸以詩辭裝潢成卷軸張青盧中及聽事壁皆滿好事相詫以爲奇丙申歲來粵游乃錄副鈔版命日鸞簫集用宋景濂送張翰林歸娶詩紫簫吹月夜乘鸞句也案翰林歸娶唐宋故事不數觀蓋登第後歷中秘二省練習朝章國典始入翰林掌綸誥故迴翔者久明承元制增置翰林院官始專選進士充之其庶吉士初屬中書六科永樂二年始定爲翰林庶吉士宣德九年命庶吉士於院讀書教養數年而後除蓋重其選也翰林職清務簡世謂之玉堂仙史稱張宣少負才名洪武初以考禮被徵尋入史局與修元史帝親書其名召至殿廷卽日擢翰林院編修奉詔歸娶宋景濂送詩云少年歸娶奏金鑾喜得天顏一笑看從此梅花消息好青綾不似玉堂寒宜非進士入翰林受敕馳傳歸而畢姻曠典異數曩代字此盧狀元催妝詩不得擅美於前矣

國朝詞垣英雋接踵溧陽史文靖吳縣潘文恭皆以翰林乞假歸娶蓋沿明洪武故事而錢唐袁庶常枚擬乞假表載集中當時更艷稱之越若由進士得館選其遇與鄉先輩史潘亞而才與簡齋相頡頏擬表麗藻亦與之同其入翰林年二十四較富鄭公晚娶爲早其辭某氏婚也近馮京其就汪氏姻也類王曾其乞假歸娶而都人士寵以詩也視宋景濂爲尤多且美異日無負座主之知則爲妃匹重爲姻亞重爲平生繫援重益足爲侍郎品藻重而不僅以科目榮也越若勉之哉翊寅耳越若同里又同舉主夙以文章氣節相切劘因述唐宋以來新進士及翰林歸娶

故事敘之簡端使有所擇焉

曼文二

三



廣東武鄉試題名錄敘代

竊維頽宮校射周官詳造士之經邊塞籌防漢代重期門之選論一鄉之秀俊簡六郡之良家唐則肇設武科宋則顯開武學類皆比禮比樂中律中規揚旌舉驪始隨胄子於虎闈推轂登壇終媿功臣於磨閣

聖朝威宣弧矢用備干城復韜列宿之芭馬鑄大宛之式神軍天策更曠騎之遺規驍勇羽林復翹關之舊制雖虎賁脫劍方偃武以修文而狸步張侯且角材而觀德六鈞之強共挽七札之厚俱穿爛大箭長弓之技距石能超熟玉破金版之書陰符解誦用以折衝絕徼禦侮寰瀛雕題鑿齒重譯而來庭儋耳奇肱貢琛而奉朔震鐸哉其效至彰其典亦至重矣粵東圻連五嶺地控百蠻樓船成橫海之動銅柱表伏波之績郊無斥堠騰檠木之夷歌海不揚

塵駕崑崙之市舫

曼文二

天

威稜遠憺武榜重開賁育之士颺於

廷赴桓之徒忭於野臣濫膺職守猥廁班行先覘騎射彎弧呈磬控之能次闕步射破的受鼓吹之賞試技勇則筋骨秀出於眾默武經則韜鈴洞中其宜拔奇選尤合格盈額悉心襄校循例貢登期有勇而知方冀揆文而奮武此日騰驤霄路

直廬儲環備之材異時

賜誠雲臺

大閱獻華林之賦庶幾樹鸞節於萬里勛邁甘陳羣

鼎圖於億年蹟侔方召云爾

廣雅尚書六十壽頌并敘

皇上御寓二十有二載日月穆耀雲氣晏溫鏡波不揚慶  
霄相暎光輔之美賴茲耆臣時頭品頂帶兵部尚書都察  
院右都御史湖廣總督南皮張公年六十矣公起家翰林  
歷位開府豐功碩畫震古鑠今海內襄觚握槩之倫皆能  
解之至於量苞宙合度越流品則以造士爲根底育才爲  
權輿使之研經以植其基攷史以閱其識覃精諸子以窮  
其變總覈百家以會其通發爲文章以宣其情鎔爲藝術  
以效其器益非材不能綜務非學不能練材非博以恢奇  
軌之正正不能績學若迺質究太始氣參元包智燭幾先  
動符造化必且馳觀域外不隘於方聞縣覽邃初不囿乎  
近習然後明體達用反經合權悟同歸而殊涂期一變而  
至道公嘗自署其堂曰廣雅所以廣羣雅之材於天下也

曼文二

三

督粵之日勅書院以造士開書局以育才胥準斯指以廣  
雅揚之論者謂公述釋讓之舊德追越篲之英談揆公本  
襄殆有尤者在焉其後移節吳楚建牙江表長駕遠馭左  
武右文垓剛坯柔彌仁曠道建樹之偉不可殫名然公夙  
夜論思尤以造士育才爲汲汲今年秋八月己巳爲公嶽  
降之辰凡受公甄陶蒙公覆燾咸思擇言以介眉壽竊見  
械樸之詩頌壽考者必推本於作人今

皇上勵精圖治側席求賢冀弼成億萬年有道之基公卽  
以造士育才裨贊

雅化所由慶

明良登仁壽納介祉延洪釐黃髮元老克壯其猷用勸相  
我國家以返無疆之庥昔奚斯歌魯尹吉誦申穆知之作  
風人所美敢式前軌敬獻頌曰

聖清降神維嶽篤生蓋臣綬我南服巖巖尙書龍驤作牧  
先世孝友用光姬錄祚衍珪組聲高鼎軸武節彪炳文憲  
淵穆澹威抗枝華裔瞻矚扇薰贊醴表裏禔福公策賢良  
早擢甲科直言極諫騶拜賡歌胄子莘莘髦士峩峩執經  
講幄知誥鑿坡讀公封章其謀孔嘉獻可替否陳善閉邪  
觀變歷胎敷患萌芽燭照著察讜荒慄遐公馳輜軒迪教  
稱盛通其津梁導以途徑選箭貢珍翹材抽穎岷峨源長  
江漢靈炳座列賈董門多廚俊突奧印窺莊衢交騁會稽  
虞對高密趙問獨持風裁咸挹水鏡公頌節度西臨太原  
山揖二華地控三秦平膠春燒故壘秋屯迺墾荒疇迺開  
牧羣吏道錯雜官儲糾芴磨鈍激頑剔蠹治紛束馬陔嶮  
飛狐塞尊邊有頗收野無賤塵公總師于南竦交廣象郡

秦折殊厓漢讓蠡茲佛郎侵軼海上柱管驚沸蘭倉怒漲  
劍躍延津烽騰鼓浪銅柱盟勒樓船凱唱薦德狼歌洗兵  
蠻瘴方隅砥平狂瀾攸障漢使鑿空蒲陶遠徠舶飛崑崙  
霆馭颯馳七洲之洋長鱷沫吹干蘭弛禁石楛損威麾軍  
下瀨習戰昆池水法陵法天雷地雷文昌司命風后握奇  
螭虎桓桓龍彫師師公教覃敷屬國震疊歸市襁負款關  
費納公德邁種烝民迺粒溝塍綺交防堰櫛立陸海膏腴  
鬱蒼卑淫材官負薪騶卒舉錡溜束牂柯湍迴鈴峽金堤  
永鞏慶流累葉公督三楚繫粵謳思公移兩江繫國安危  
鱗介犯順凱高句麗沃沮輕襲渤澥窺窺財賦大邦饋餉  
是資松浦朝塞榆關夕披公鎮其間神筆指麾折衝東溟  
彈壓南維五部賢王四夷蕃將詹后隙密擊鼓聲壯示以  
恩威消其悍獷帖耳受弭迴面內嚮屹屹崇臺森森武帳



羊祜減衛馬隆選仗雷雨經論海山測量背崑難撼曳河  
誰抗豫順以動震象大禽濡尾曳輪奇肱飛車管尊王室  
羸敗霸圖方軌並進小戎先驅設險守國營京宅居棧航  
獻琛列邸上都通道蠻越轉輸荆吳飛芻輓粟用護儲胥  
小東大東久空杼柚婦休鸞織眠盡舟服犯斗乘查觀風  
問俗支機之石攜自星宿紉輶不勞纛益彌肅吳縣競販  
賓布罷鬻經緯萬端衣被億族庶昌且半旣富方穀卅人  
之職隸於周官形色圖辨鹹淡味傳地不愛寶是究是殫  
惟金三品貢借鏐鉛泉府舊則范規大圓誰使屬賓錢流  
市闔迺造銀幣迺采銅山率土奉朔統天建元平準均輸  
桑孔典掌桓寬鹽鐵議細秦鞅大農算軹文學騰誦惜無  
閱槩俾弛密網公開其源而泄其藏周策價贏鼓鑄程册  
歐冶之屬昆吾之匠飭材必精攷工是昉凡此經國載載

大猷匪曰新法實唯老謀九圍咸式六府孔脩有翼有嚴  
不競不絀沱鬻南紀淮海上游德廣所及功無與侔嚮風  
喁喁敷政優優方召之績申甫之儔公儲瓌才首辨學術  
攻厥異端距彼邪說正說明道黜華崇實周孔薪傳孟荀  
藥樹輓近夸詐本實先撥橫議風生卮言日出迺頒規條  
迺給筆札通經致用大雅宏達諸子派別百家區分蘭臺  
篋述石渠攷論向歆宏咸最錄是勤鉤元提要殫見洽聞  
寫官頗鉅藁本爛珍探索與旨校讐祕文一孔面墻罔窺  
典墳津逮來喆豈惟饋貧疇人祿數原本六藝句股弧綫  
周髀渾蓋大儒治平小學格致會易相激水火旣濟孔墨  
道殊淺識深詆尙賢節用非命貴義輕重縣均短長景蔽  
巧載拙輒世矜奇技公棊典籍學林所宗鍼膏砭育振聵  
發聾乙部編輯丙舍旁通七略九流四達八牕堂表臣範

軒開抗風徵文攷獻惠此海邦鈔撰古今銓輯異同襟祇  
多土薰陶羣工翳昔韓蘇文章巨手風被要荒化漸領右  
亦越儀徵雅材淵藪唯公廣之曠世罕偶九譯知歸八紘  
在宥羅絡千品囊括萬有暉麗景鍾幹運魁斗功德允禱  
身名並壽當公覽揆爲公稱觥望公綽來袞衣繡裳兩朝  
開濟百姓采章揚歷優賢登崇俊良鴻漸爲儀鳳麟歸昌  
冠冕函夏黼黻明堂洪鈞有治爰福無疆

壽考作人翼我

聖皇

曼文二

三

廣州三君祠碑銘

嶺海之表有大都會焉欲風吐雲沐日浴月扶輿翬薄南交是宅衣冠輻湊實惟廣州三代以還淪於夷裔秦併天下郡縣始開任囂荻雄而阻兵趙它倔強而稱帝君則椎結左衽民則斷髮文身士燔詩書未覩壁臧之籍吏習刀筆不登著作之庭自陸賈遠游歌皇華於越絕揚孚博覽志異物於炎荒闢文章之徑涂飛大雅之輪蓋其後劉熙避地經述鄭君士燮臨州傳通左氏學流聞而仰鏡詞苑鬱以成林然釋名雖撰僅訓故形聲之崑牒例卽詳罕激揚雅俗之旨由漢迄唐由唐逮宋氣節特立爲一朝之儒宗風標卓然任百世之師表者其惟前制府南皮張公所祠之三君乎漢虞君諱翻字仲翔家承舊書少有高韻曲鍼磁石之譬追與客賤美璞彫磨之譚益光時譽衰經而

曼文二

三

隨王朗葛巾而說華歆孫討逆委爲功曹侍以賓友豫且困龍諷使君之游獵疏步引馬招部曲以角聲還守富春遂畱吳越祕此家寶且當爲吾蕭何污人餘財豈屑就彼盜跖州舉茂才朝徵御史炎祚告終遲未赴職參呂蒙之軍事比方朔之伎能與俗多忤乘船而叱糜芳爲臣不忠抗鞭而擊于禁卒以疏骨難媚犯顏屢爭陽醉伏地幾遭手劍之誅醜謀求仙竟觸披鱗之怒始遷交阯終徙猛陵棄骸絕域因賀尊號而上書屏跡訶林乃翫象占而立注顧命瑁同之辨疑訂鄭元坤豕得喪之辭解讖苟爽拾遺匡謬殫見洽聞會稽竹箭論早定於神交散髮鹿裘夢先徵於郡吏呼青蠅爲弔客長沒瘴鄉望蒼梧而歸魂方離蠻嶠吁可傷矣遇其塞哉然而謬謬遺直周舍之賢見思蹇蹇匪躬袁宏之贊無愧非獨帝設虛坐人推大師三父

自足道契於參同五世相傳說符於鑿度已也唐韓君諱  
愈字退之操行堅峭造文闕深幕官辟應旋調國子之師  
宮市疏陳卽貶陽山之令才高數黜秩久不遷作進學解  
比揚雄之荅嘲成原道篇殊荀況之言性旣掌內制遂參  
中書時則蔡州鳴張徐甸狼跋中丞裴公論賊可滅君亦  
定策力贊大謀乘傳入汴因收雪夜之功勒碑平淮益壯  
風雲之氣弢甲南服踐司西垣乘正色以正朝政異端之  
害道鳳翔宣詔迎佛骨於禁中獬廌抗章動帝心於言外  
嚴譴將逮鑿臨匪遙一封入奏舉藩閭太學之畱萬里投  
荒拜表感炎陬之窟墮跼鳶於毒霧漲海連天驅橫鯨於  
惡谿濤瀧搭地仙仙眼睨肯偷活以羞吏民渾渾芒芒能  
飛文而謦水陸周咨疾苦竟格冥頑暫止內移重叨右轉  
至於宣撫奉使折衝臨戎喋血以出解牛元翼之圍戴頭  
而來挫王庭湊之敵類皆光爭日月氣引星辰金石鏤其  
忠肝丹青繪其古誼何止文起八代言成一家濡染大筆  
抗手於鄒枚挖揚元風嗣音於蘇李明道替爭臣之論不  
愧官箴述功簞聖德之歌無慙史職也哉夫莫爲之前雖  
美弗彰莫爲之後雖盛弗傳眉山蘇君非有宋之傑而謫  
宦於粵者乎君諱軾字子瞻高材對策弱冠通經讀范滂  
彈劾之奏志在澄清陳賈誼治安之書言多慷慨制科雖  
屈其等潛邸蚤聞其名阻撓新法諫放青苗之錢媒孽上  
詩鍛成烏臺之案左遷杭判安置黃州載酒船於赤壁築  
室東坡煎茶鼎於惠泉買田陽羨起團練之副使登翰林  
之清班迴翔旣久先賜延和之緝召對何遲並徹便殿之  
燭奇才嗟其不偶內相惜其難畱憶湖光於別後竹閣柏  
堂歌水調於尊前瓊樓玉宇過潁曲以紆權向蜀岡而看

花瓠落一官升沈十載羣賢斥逐元祐黨籍之碑父老從  
遊惠儋蠻獠之地移居則峯依白鶴訪古則壇甜青鸞擘  
荔飽啖謠僊姝於海山負瓢行吟遇夢鑿於田舍結枕椰  
之庵而聽雨尋苜蒲之澗而踞雲命宮磨竭受章蔡之賦  
排文海掣鯨追歐梅而驟靳固已雄視百代激昂一時鍵  
戶著述有斜川之佳兒聯牀對眠得藥城之難弟至其大  
節挺挺發忠規爲讜言光世能熊雜嬉笑與怒罵跡雖儕  
於玩世情自篤於愛君集置御座謂爲文章之宗鑒遽深  
宮許以宰相之器尤足濯磨士類模範人倫觀玉局之慶  
霄識金門之奎宿者矣粵故多賢吏吳隱酌泉以明潔虞  
愿觀石以表清或投香於浦中或擲硯於洲上或裝惟櫛  
刷或餽卻瑋犀皆能以廉矯貪以節勵俗至乃直言極諫  
世諒其孤忠奧旨瓌辭人欽其絕學風采繫朝野之望姓

名爲婦孺所知蠻烟蠻雨觀斯文而頓開瘴海橫流視吾  
道以如砥激仗馬使生其媿屏俚蠅使息其喧卓哉三君  
曠代相感今雖榛蕪虞苑潮咽韓谿寺已冷於靈洲阿全  
荒於越井江魚免葬空悲骨相之屯隴吏迎呵同泣孤臣  
之逐然瓣香所勿替卽英爽所常憑前制府南皮張公仰  
止高山維新祠宇應仙城之星聚珠解塵銷當秀嶽之雲  
飛絳霄閣疎鈞天樂奏遣巫陽而下招大荒神游合尸祝  
以不朽粵嶠之簪裾畢集朝臺之鼓吹無譁儀衛颯沓駕  
青螭與赤虬薦欵闔紛陳黃蕉與丹荔敬揚盛軌爰勒貞  
珉表古君子之風爲都人士之式豈唯遺經窳奧尋墜緒  
而叩窺正學津梁踵絕塵而高騁銘曰

偉矣先生習經梓鼓甄極崑崙緯洞該墳素漢廷特徵吳會  
間阻直諫難悅蹇諤取忤辭彼舊都徙此蠻土發聾振聵

教澤斯溥昌黎端慤信格豚魚佛老是關孟荀之徒原本  
經術曠如奧如發爲文章玉佩瓊瑤遵海而南瘴微宅居  
狂瀾手障翳維醇儒大蘇英英博涉經史刑賞忠厚論冠  
多士當時文體磔裂詭異賴公振之淵亭嶽峙蜀洛分黨  
攻擊始起羣小痛擠遂貶僭耳嶺表薄俗人競於貪氣節  
不道寵榮乃耽落落前哲曠世唯三稷契自許龍比何慙  
聞風思奮懦立頑廉伊誰之功與夷惠參

曼文二

三

開平縣勸建鳳山書院記代

開邑在古恩新二州間山川阻深風土瘴厲唐宋時唯遷謫嶺外者至其地故文學之士罕稱焉明代尚僚時出侵軼始於倉步置開平屯崇禎季年改建縣治析新會新興新寧恩平四境來隸設令長儒官以導其民始立學校

國朝因之後又割置鶴山而開平以劇縣著稱雍乾嘉道四朝科目漸顯有登卿貳府封圻者咸同以來屢困於兵士客構釁民氣彫敝司牧之官教養未至其獷而野者習剽掠其黠而貪者健爭訟軌法之徒日斷斷於庭剖浚不當則且訐告長吏操之蹙則民媮御之寬則民玩故自來稱難治而近尤甚歲在壬辰予始受事思有以變其俗而彌其衷也先開以誠次飭以法去其不率教而害羣者暇則進諸生而敦勉之軌之卧碑繩之彝訓肫肫然髦髦然

曼文二

三

以廉恥相勸禮讓相期在官年餘士氣始奮復念志乘久缺懼無以爲激揚之具也因延薦紳召耆秀使助輯錄而備咨詢邇自道光癸未迄今乙未逾七十年文獻無徵采訪罕獲學不師古怒焉予懷夫訓誥通則經術明攷據審則史裁洽根氏深則才華茂見聞擴則器識闔方今治道彪炳同符漢京獨此邦藝文闕焉不講豈學校之未修耶抑書院不足儲其材而博其趣也邑故有蒼城義學有志之士覃精講藝亦足以習帖括取科舉至於研經注史涉獵百家非別築精舍選高材生肄業其間不聞有厠著作之林登宏達之選吳越楚蜀多雅材其軌迹可睹已粵中自儀徵太傅開學海堂提唱英流爲時冠冕近南皮張尙書復立廣雅書院士習丕變郡縣皆仿行之開邑僻左無彬彬之稱造士失職予甚惡焉爰蠲奉擇地勾工庀材於

縣治北門內新建古學書院講堂三楹庀經籍數千卷前後翼以齋舍爲階爲廡爲門爲牆復闢餘基曰師範堂祀漢許鄭兩君粟主所以尊經崇儒爲諸生端其表也昔文翁治蜀常遣學官弟子詣京師受業博士而司馬相如揚雄輩出焉今制郡縣皆設院課士長吏躬自董勸復延淹通之儒爲主講使諸生得優游誦習於其間負笈不勞事逸功倍他日瓌奇雋乂接踵興起方將潤色鴻業爲邦家光豈獨儒林文苑增一邑志乘之重而已抑又聞之事易於扞難於繼業精於勤怠於荒學非積久不爲功道非恢宏不爲量倘宰是邑者因其基而益擴之拓齋舍籌經費增員額覈課程日異月新毋廢毋改庶幾文采淵懿風氣醇美士被其澤而民蒙其庥今區區之締造其權輿其嚆矢而私心所願望尤靡涯也城非數里有鳳山蔚然聳秀縣治所枕而院適受其脈因楹以爲名並於落成作記勒石用勸諸生而諭來者冀衣冠之盛甲嶺海不佞亦預有榮焉時光緒二十有一年歲在乙未涂日之朔



莊母壽議室記

壽議室者同歲生莊君蘊寬偕其弟兄澤誠歸奉其母賈恭人之所居也毘陵之莊世爲郡望賈亦武進著姓恭人祖諱鵬程嘉慶戊子舉人婺源教諭考恕行有潛德隱居教授恭人幼秉軌則徽柔懿恭閑於德容習於禮訓笄年歸我年丈仲求先生敬事尊章咸得其意汪太恭人常贊曰女憲遺也咸豐庚申吾郡被寇時年丈遠客武昌太翁在里聞警團民以禦賊城破受重傷跳而免大恭人率諸婦闔門就縊居負郭賊已撞門入太恭人頭觸階石歎血罵賊死恭人纒絕仆地賊斫十餘刃以爲已殊僵臥一晝夜有備媪撫之氣尚溫乃負之起僦小舟避於鄉與太翁遇卽之浙避兵太翁疾遽作恭人負創未合頸血涔涔下侍湯藥不稍懈年丈聞變奔訪值於蘭谿太翁病已革謂

曼文二

三

年丈曰善視汝婦吾非若不得復見汝還也同治建元東南蕩平年丈佐吳越幕府者十年恭人任家事料量井井宗御稱之後年丈以同知仕閩隨撫部勦臺北番論功擢知府檄署霞浦縣事恭人佐內政廉問益著蒞官數月夏亢旱設壇步禱澍雨立沛因中暈病甚危恭人籲天以身代卒不瘳時賢子澤誠歸應省試蘊寬甫童叻恭人忍死治喪奉柩至閩澤誠聞訃亦來奔督部何公璟與年丈道義交聞砌後緇帑三千金乃慰其孤使勿爲意當令受代者彌之恭人泣詔二子曰若父爲廉吏常恨仕宦者侵帑今骨未寒豈可累人乃罄衣飾變值得千餘金又積僚友賻千餘金解官償所虧何公慙然曰莊氏有母吾友固不死矣恭人率二子還鄉里海內賢達聞恭人風爭致賻以營葬事畢遂屢空恭人節縮衣食督賢子學數年皆入郡

邑庠蘊寬辛卯鄉舉落副榜恭人曉之曰世俗重科目我  
意不同汝曹勉貽親令名吾不厭疎水也賢子負米恆容  
游歲時始一歸省乃謀服官爲祿養地澤誠筮仕得知州  
蘊寬以廣西同知謁吏部引見值恭人六十誕辰將偕歸  
奉觴爲壽恭人曰汝曹有餘貲當施之寒者飢者不愈於  
爲我壽乎毋飾觀逆吾意賢子奉命不敢違却寅聞而稱  
曰今俗所稱顯揚者類皆蠟上第膺臚仕竊取厚祿隳民  
之膏歸則飾輿服耀鄉里詔謂然自以爲榮而不知貪墨  
敗名其辱親實甚焉世衰道微仕宦益雜或賄賂相市苞  
苴相通夙夜營營求獲乎上而不得乎民不信乎友不順  
乎親詔以義方亦且淡漠置之一旦被劾屏不齒錄隳其  
家聲又豈能貽令名耶卽有舞綵承歡稱觴洗腆務飾觀  
美費中人之產而不惜問其所入則皆跡之餘也而族鄰

曼文二

早

之寒者飢者曾不得稍分餘潤脫其親好施子耗絲粟匪  
唯德色且竊訾議之詬病之然則順親者罕觀矣澤誠昆  
弟廉吏子弱冠立名節以清介稱賢豪長者皆慕與之交  
又能奉賢母教思貽親令名而勿逆其意以書來諭且徵  
文爲恭人壽却寅與蘊寬生同里長同學舉同歲游同方  
知恭人德最稔不敢爲游揚之詞頌禱之語敬紀其實以  
壽恭人使世知莊氏有母故能垂榮問於無窮而累葉承  
其蔭也豈不懿歟賢子以壽讓署恭人室詩曰焉得讓草  
言樹之北謂堂北植讓娛其親俾忘憂也順親之意貽以  
令名則親娛樂而壽且康矣爰濡筆爲之記

岳孝女贊

昔叔雄赴巴障之川女勝配上虞之里太倉坐法緹縈上書孤城被圍荀灌求救類皆事彰壺則名著史成茂宰表其寒閭誼民傳其逸軌然哀憤中激或勇於成仁險巇卒遭同甘於致命未有懷結明發募深孩提貞儷黍室并輓倚柱之吟老伴北宮勿渝斃瑱之操如孝女岳氏二姑者也孝女四川眉州彭山縣人故大將軍威信公諡襄勤之六世孫宗功祖烈銘偉績於太常武達文通踐清班於中禁勛閥之盛家牒詳焉父維柱廩貢生選廣東清遠縣巡檢調順德縣馬甯司孝女德音塞淵惠問令淑裴頤之箴夙翫荀請之戒尤嫻隨宦粵時其父春秋高母老且病兄嫂早世遺孤方咳孝女身總家政秩如也及笄之年聘者踵至父母將許委禽焉孝女茲然曰鞠我鬻我既罔極之

未酬恩斯勤斯非所生而何恃矧兒內鮮姊弟外無期功倘役箕帚義當從夫誓依庭幃庶可奉母開譬屢逮執持益堅彌敦白華之思豈奪赤石之志已而母患轉劇臥起須人孝女晨昏抑搔寢食調護婢媪無假其手勸勤不形於心積十餘年戚鄰嘉歎辛已歲母疾革幾不起孝女剖臂肉和藥進飲刃捨地一鬻嘗而頓瘳焚香籲天九穹鑒而來格掬爪請代頽齡允延其後父母以耄壽終盡禮盡哀感動行路誨督兄子克荷門業教養備至迄乎成人光緒辛卯事聞於朝詔旌其閭坊表如律烝嘗四節西道標貞女之稱東帛百端東州賜義姑之號彤管有煒矜式存焉烏庠斷竹續竹久曠乎嗣音裾絕裾恆違乎定省循陔之謠莫補陟屺之眷空滋搯臂而負薪不歸穰拳而操櫟長往員郭諫息易觸槐樹之庭方輿記成徒傳荆棺

之峽薄俗難挽醕風愈漓如孝女者洵足列中壘之編垂  
大家之範者矣爰爲贊曰

峩睂削成千仞巉壁湛湛之水粼粼之后竺生孝女秉此  
純德不櫛不笄女任子職嬰兒無恙威后是容 旌以綽  
楔用彰

孝治羅鳳有闕先尼有碑貞珉同刻亮無媿辭

曼文二

四

馮烈婦述

烈婦方氏名朝佩巴陵人大父功惠廣東補用道父大森  
侯選直隸州知州母蔡恭人外祖諱以儲湖北鄖西縣教  
諭咸豐九年洪逆竄楚悍黨號數十萬攻鄖西縣官飛檄  
告警而救不至教諭君激厲士民登陴固守旬日城陷乃  
具衣冠率家屬投頰池殉焉時蔡恭人年十三入水不湛  
賊至拯之出索藏錕蔡恭人憤且罵不絕口賊怒斫之額  
受數刃絕仆地賊去復甦遇老僕送依姊家醫年餘額骨  
始合今髮際創痕尙縱橫也烈婦之生與蔡恭人同日時  
故小字曰同又聞恭人冒死櫻賊鋒卒免於難謂貞孝足  
奪賊氣而邀神佑也因自字曰同貞辛巳歲烈婦之姑歸  
江寧黃君思永時黃以脩撰官京師父母送姑入都烈婦  
尚幼畱侍重闈然孺慕彌篤輒懸其親小像日焚瓣香祝

曼文二

四三

平安暇則翫管學書問字於諸姑伯姊孝經列女傳皆成  
誦逾數月父母歸烈婦侍膝下跬步不離大父偶患恙諸  
孫環侍烈婦衣不解帶代父母服勞歷久勿渝其至性肫  
摯有過人者事叔母及庶母敬謹盡禮愛諸妹若同產庭  
闈以內諭如也性明惠識大體嘗語女兄弟曰吾家自大  
父母以次骨肉數十人吾親居長每事先以禮讓故內外  
無間言家庭以恩爲主敬爲輔無是非曲直之可較也吾  
輩善體親心則詎諍何自生耶其御僕媪無疾言遽色然  
亦不輕嘖笑故人皆敬之重之兄朝坤以諸生困場屋恆  
鬱鬱不自得烈婦規之曰吾家世積累大父藏書數萬卷  
蒐遺籍播藝林在官勵清操不取一無名錢其後必有達  
者吾母痛親嘗賊蹈白刃不顧貞孝之性格神明兄當自  
奮貽親令名勿以區區得失墮其志也兄聽其言改容聽

受嫂張病且革一女生未彌月視之慟烈婦慰曰嫂無憂脫有不諱撫育妹躬任之嫂頷而歿自是保抱鞠養晝夜操勞女竟賴以長成其篤友愛重然諾類如此今歲二月歸祥符馮少尉景釐爲繼室少尉舊家子雖屈下僚溫溫有儒雅風烈婦事之必敬必慎結禱甫一月少尉遽染時疫越七日疾愈劇烈婦焚香籲天乞以身代又割臂肉和藥進卒不瘳彌留之際屬烈婦隨櫬還侍尊章以兄子爲後善撫之烈婦曰高堂之奉有種娣在嗣續之立有伯叔在妾唯從君地下耳少尉歿後烈婦殉志益沒檢少尉遺物扃於篋分簪珥贈諸妹其嫁衣亦緘藏之僕媼窺其意防護甚密凡三吞金一飲刃一投繯皆被救得不死父往慰諭烈婦從容與父設請歿後棺斂一如婿使雙楸北旋見者知父愛婿與女同也父知其志不可奪勸以西法照遺像烈婦恐傷父心未卽諾父謂爾誓殉夫當留像歸夫家他日嗣子得瞻拜禮亦宜之乃映二像自題詩以明志至五虞延尼誦經哭奠畢遣僕媼出視事乃入室仰藥啜粥一匝沐浴更衣肅拜告靈旋即就寢垂暮始戒女僕曰視吾有變卽徹帷帳飾釵環易冠帔吾從夫逝是謂令終汝不作種種惡狀使汝曹怖也俄頃鼻息如鼾聲漏三下喉間格格似痰涌家人檢座隅得儲藥器亟營救齒禁不能啟向晨氣絕經宿而殮面如生烈婦生於同治九年十月十一日巳時卒於光緒二十二年五月初十日寅時得年二十有七兩族姻鄰官於粵者欽其風義咸往弔祭冠蓋塞塗婦孺踴觀靡不感歎同鄉官以狀白大府 奏旌如例嗚呼世俗澆衰倫紀日薄大節不奪士夫所難如烈婦者非所謂激頑植懦也耶林兵部承澤紀烈婦事甚詳

爰述大略備情史采擇焉



曼文二

四五

爰述大略備情史采擇焉

湯伯汗先生傳代

湯君諱球字伯玕黔縣人少劬學從同縣俞先生正燮汪先生文臺游博通諸經篤守家法隱居教授章句訓故以鄭氏爲主諸生舉經義相質必引據師說徐下己意彼其異同無穿鑿無傳會宣歙間學者宗之黔山縣僻小而士皆潛心經術實君爲之倡也其事親以孝聞父永懿老病且篤君謝絕人事壹意侍疾衣不解帶者逾數月父竟獲痊以耄壽終居喪哀毀盡禮杖而後起性耿介授徒奉親束脩外不受一無名錢鄉里敬其清操亦無敢干以私者咸豐初皖中爲賊蹂躪郡縣承檄練鄉兵當事者免君直練局君自謂非禦侮材且鄉兵訓練無素不足辦賊死非所懼懼爲賊汚耳遂避地去後賊果大至始服君先識高蹈云君願身長髯多鬣強識早歲覃精銳思治疇人學中

西算法靡不洞曉尤善天官家言開元占經悉能背誦星緯推步研究其奧而不屑以藝事名亂定後聚書數千卷杜門著述補輯鄭氏逸書九種孝經論語注蒐采尤備並補輯劉廙孟子注劉珍等東觀漢紀皇甫謐帝王世紀譙周古史攷傅子伏侯古今注等書皆前人輯本所未逮又以晉書爲唐所修房元齡傳稱其時史官多文詠之士好采碎事競爲綺豔劉知幾亦言自貞觀中更加纂錄凡所修撰多聚異聞言晉史者皆棄其舊本迺廣蒐載藉以補其闕而糾其譌撰錄成帙凡二十三種曰王隱虞預朱鳳何法盛謝靈運臧榮緒蕭子雲蕭子顯沈約九家晉書皆正史類也曰陸機千寶曹嘉之鄧粲劉謙之王韶之徐廣裴松之郭季產九家晉紀曰習鑿齒漢晉春秋孫盛晉陽秋檀道鸞續晉陽秋杜延業晉春秋蕭方三十國春秋皆



編年類也又輯常璩和苞田融王度陸翹范亨張詮王景暉高閭裴景仁姚和都張諮劉昞喻歸車頌段龜龍等所撰偏霸各史而崔鴻十六國春秋百卷爲鉅觀又補撰年表一卷校定纂錄十卷其所刪訂足正屠本之失蓋君平生精力唯此書最深邃矣又旁輯兩晉詔鈔晉起居注鈔庾詵晉朝雜事張敞東宮舊事車灌修陵故事盧緝八王故事四王起事應詹陶公故事桓元僞事傅暢晉諸公敘讚晉公卿禮秩故事荀綽晉後略記晉百官表注晉百官名寮屬名杜預律本賈充晉令張斐漢晉律序注摯虞波疑要注皆典午一代掌故所資其區宇則輯太康地記鄴中記林邑記凡三種其言行則輯晉諸公別傳袁宏名士傳郭頒世語裴啟語林山公啟事凡五種又著錄晉別集三百家晉文集三百家皆手自校寫艸彙具存至被兵時所燬卷帙不在此數其纂述可謂勤且閎矣同治六年詔舉孝廉方正同縣程先生鴻詔以君行誼白大吏應其選而君抗志沖雅不就一官以著作終其身鳴虜非所稱傳文君子者歟光緒辛卯廣雅書局刻君所輯十六國春秋秉恩提點局事獲預校讐因據程君所述事略及撰錄書目次爲傳庶以備延閣之采焉

誥授朝議大夫湖北候補知府伍君家傳

君諱繼勛字次蓀常州陽湖縣人曾祖宏道祖卓吾考植  
珊世有隱德皆贈如君官君岐嶷夙成器識開敏弱冠有  
幹材道光三十年粵逆洪秀全倡亂君由內閣供事議敘  
從九品赴廣西軍營從巡撫鄒公鳴鶴守桂林古勞選武  
昌府經歷時洪逆已竄入楚境圍長沙陷武昌順流而東  
賊勢甚張湘鄉故相國曾文正公以禮部侍郎在籍團練  
奉 詔督軍出勦賊君詣營次上謁文正一見稱賞咨雷  
隨軍克武昌省城錄功以知縣用巡撫胡文忠公間君才  
復調營勦理文案咸豐五年權漢陽縣事時賊氛四塞武  
漢被蹂躪尤甚戶口殘破城邑蕭條君拊循安輯民氣頓  
蘇逾歲受代去攀雷塞途有泣下者其年冬因案呈吏議  
後數月督撫奏復原官仍雷湖北補用胡文忠公規取皖

曼文二

四

中督師東征檄君理營務擇險要築礮堡屹如堅城並赴  
前敵審察形勢建三路進兵之策繪地圖數十紙山川阨  
塞瞭若指掌曾文正胡文忠均矚其議采而行之卒以此  
復九江克安慶文忠歿後曾忠襄合圍金陵遂奏膚功皆  
如君言事載曾文正集中自東南大局糜爛洪逆竄踞數  
行省賴二三鉅公以湘楚全力支柱其間焦心苦思轉戰  
千里賊燄屢熾屢挫卒就蕩平中興之功赫然照耀百目  
君在戎幕最久定策於數年以前與曾胡二公規畫措施  
若合符節其識可謂偉且遠矣君以文吏佐帷幄無塞旗  
斬將之功而克復孝感以三十騎破賊數千論者咸服其  
奇績先是胡文忠由潛霍規皖逆酉石達開糾悍黨十餘  
萬分道窺楚求解廬桐之圍武漢戒嚴君在營間計丁母  
憂守制不出文忠因軍事方棘飛檄奪情調隨都統舒公

回軍援鄂以顧根本聞賊大隊趨孝感知縣韓某告急君偕舒都統率麾下勁兵馳往救之舒公忠勇素著以三十騎先入城與君同駐考棚大軍在後繼進未至城無守兵賊數萬已壓縣境相距七八十里自夜達旦警報踵相接遲明賊前鋒五六千襲孝感入北門君定計令閉考棚偃旗鼓且勿動俟賊銳氣懈與舒都統率麾下騎出賊不意馳突轟擊以洋鎗斃悍賊數十時賊已填塞街巷肆意飽掠黎婦女置馬上爭攫財物負重纍纍忽聞城中伏兵起大驚潰竄奪門狂奔舒公麾下皆敢死士驍勇善戰所向披靡羣賊自相踐踏死者無算追殺三十餘里賊逸已遠乃收隊回城向午大軍亦繼至賊聞舒都統來皆棄壘遁知縣韓某性選懦賊襲城爲所戕副都統德克精額隨舒公襄營務因足疾發不善騎自經死逾月舒公移兵駐武

昌賊躡其後孝感復陷竟以此不殺功君又從金公國琛再復孝感克德安府及隨州事聞以直隸州知州用賞花翎同治二年服闋由營起復時東南大定君仍留鄂需次署興山縣事在官逾年興利除弊百廢俱舉解任後檄修鍾祥縣獅子口堤工時漢水暴波天門鍾祥被災尤甚堤當其衝原議發帑十二萬緒君躬自履勘籌節浮費覈實報銷凡用帑八萬緡有奇其羨餘白大府振災區饑民賴全活甚眾上官以州縣築堤每溢原估侵漁偷減弊滋多獨君工堅用省益加倚界並以君郢工紀要刊頒所屬奉若科條至今逾數十年獅子口堤無潰波之患皆君力也工竣後權知漢陽府事同治八年奉旨以知府用九年檄修潛江天門兩縣堤工其鞏固一如鍾祥明年又督修荊州府城以兵法部勒工役不勞民不傷財大吏上聞優

敘加一級十二年春入都引 見仍以知府發往湖北奉  
檄督銷河口鎮川鹽調總沙市釐局商賈懷德課饒裕如  
完權逾歲遘疾卒享年六十有四君姿制嚴重經畫宏通  
歷受曾文正胡文忠官文恭數鉅公之知出入兵間勞勩  
日積事平後一攝郡符未竟其用論者惜之咸豐季年蘇  
常相繼淪陷戚御至楚避亂者數十家君收卹資給情款  
甚勤量其器能咸使得所蓋天性肫竺本乎自然至於恭  
以接物儉以律身皆崇尚悃悞不同矯飾又其服官爲政  
廉平當時無赫赫之譽而利澤所被沒猶見思雖古循吏  
蔑以加焉配何宜人有賢德君客廣西時家無儋石宜人  
以針帶養姑並誨督二子負笈從學躬操井臼備極艱苦  
及君注選歸宜人已先卒繼室王氏張氏長子颺湖南知  
縣次學純廣東知縣皆何宜人出次學涵國子監生次秉

曼文二

辛

誠廣東典史某宜人出女子五人長適屠次適仇適姚適  
冒適孫君以道光某年某月日生光緒某年某月日卒葬  
於常州陽湖縣之某鄉翊寅於君爲從外孫曩歲奉親僑  
寓在鄂間君治行甚稔今舉其卓犖大者次爲傳並繫之  
贊曰

懿歟伍君秉德獨酌生遭板蕩志靜鸞塵爰贊戎旃王事  
惟勤襟奇蘊智壯猷克伸一麾典州酬庸策勳捍禦江漢  
功德在民峴山之碑抗踪古人輝此家乘詒厥後昆

祭朱鼎甫侍御文

烏庠先生當世龜鑑詰人云亡邦國瘁殄先生起家侍從  
三殿朝夕簪筆論思納諫出握文柄遵彼江漢杞梓梗枿  
鬱爲時翰封輶入告 巫簾引見既盡臣職益彰

主眷移官西垣嶽嶽解鳥神羊觸姦屈軼指媢文恬武嬉  
召侮釀患疏請修省斥及閭宦中旨詰責思獲嚴譴先生  
抗章晷色不變驅之出臺風雲黯澹寒蟬仗馬視此赧汗  
曹部浮湛魏關依戀將母來諗山裝未辦瘴海南遊投荒  
坐歎戈戈束帛屈主講院披榛采蘭宏獎靡勸于鎮騰冶  
千辟萬濯粵躡炎維文彩絢爛型以范樞削其藻翰樸學  
始顯華辭勿炫斐然成章儒林列傳溝通漢宋誕登道岸  
賈董程朱詣極一貫先生遯跡江湖汗漫先生塵懷觚棧  
天半龍集甲午朝鮮構亂叢爾島國長蛇食薦流球旣夷

曼文

三

冲繩是翦窺我藩服三韓淪陷遼瀋舊京左臂已斷彼昏  
不知虜氛潛煽敵犯平壤守將猶置酒高會 先生巫夙禍機洞見視而  
勿瞑夜有餘憾蒙違屯黠麻衣營窆金華歸神于載隔面  
炙雞絮酒隴嶺遙奠真祠堂展拜淚下如霰側聞邊烽近徧  
畿甸芝罘擊椽榆關傳箭析木之津神州赤縣北門鎖鑰  
誰掌其管列戍潰逃羣帥酣豢譬彼市人一鬪而散中原  
脂膏刮髓敲骨天何夢夢坐視塗炭山積糗糧川浮組練  
委棄輸敵曾不畱盼龜玉毀積典守欺謾懷竊軍資望塵  
先竄朱雲請劍攀折陞檻太阿倒持齊斧難斷先生立朝  
大策早建諫艸在篋孰秉國憲一蹙莫振萬言徒獻廣厦  
將傾橫流竟遍忠肝金石間且扼齋乘彼白雲豈能無瞻  
庶幾英爽憑此虞苑朝漢臺高靈旂掣電風激頭懦氣鍾  
廉悍竺生偉材干城充選尙饗

祭呂太學文

毗陵之呂實惟望族蟬嫣甲科英風載穆繫君醅茂遺榮  
返朴崇彼素履闕此良璞羽齡媚學貞疾劬讀削簡緝柳  
陳經漂麥譽起龍文馨流駿足長老傾衿朋輩推服中夏  
喪亂江南可哀蒼鵝近出銅馬遙來列郭降火連城劫灰  
陌纏榛杞門掩蒿萊陽九之厄百六之裁鏗鏘頻觸肝腸  
盡摧盜斫能脫神扶使迴魂鯀喘定涕雪顏開阿兄幸逢  
茲母無恙流離瑣尾間關北上厯亭僑寄明湖酬唱機雲  
望齊求點名抗大被晨共連牀宵向奉輿承歡循陔絜養  
全護告殂丹旒銜槍馬鬣營冢牛眠視菴里閭重返家巷  
幽栖駕言出遊澗水東西故人嘉招六橋雙堤驢疲策阮  
鳳逸琴嵇好爵將浼歸裝遽攜懷任滅刺尾甘曳泥亮節  
疇執時榮競梯懼玷名德慙蒙品題嗟彼薄俗簪黻相曜  
拜輒望塵媚還煬竈舞袖邀憐儒冠疎誚權門附熱通津  
據要君獨夷然未屑同調梁父行吟孫公坐嘯邱園遯肥  
衡必饑療世情久疏高韻彌劬詰昆宦粵君來省之榻住  
陸解樽開謝池五湖秋風葦鱸動思契闊十載分張一時  
祥徵鵬鴛既遇龍蛇天道寧論人琴共悲神歸崆峒景散  
醺醺絮酒奠醞靈其鑒茲

與王雪澂太守牋

睽侍隴月依馳甚勤前叨短牋亮塵典記伏承禔躬多勝  
道衛馨宜無任翹企翊寅解裝端州晨夕助校此邦陳欽  
父子世治春秋士變弟兄兼綜儒史媚學之士經術湛深  
旣括春華亦佩秋實唐則北海石室之記宋則東坡蜀岡  
之詠文采照耀流播遐陬耳目所濡益開風氣頃已試八  
屬諸生角犖卓犖不減廣州張使君披榛採蘭勲於搜剔  
所披甲乙寒畯居多請謁不通廉問彌劭自維陋劣無補  
纖埃唯此冰心差堪共質歲尾輟事卽當撥棹言旋小憩  
塵勞藉聆警效也昨得文冲書具謠雅懷一再推輓循省  
逾分愧竦載增自館高齋從事鈔纂輶軒使者之語綴拾  
叢殘健爲舍人之箋網羅散佚譔述靡就忝竊已多矧迺  
孝緒七錄派別未窺安世三篋遺亡罕憶徒思子才之誤  
敢校更生之經執事謬采虛聲委重太過積薪譬其居上  
揚秕晒其在前三素餐有伐檀之譏銜驚無刻楮之技責望  
難副詆呵易叢恐辜尙書宏獎之風兼愧執事延攬之悃  
已浼文冲敬謝台命澤山格韻通峭淵默寡營至其文藻  
彌復雋拔西林學識淹貫校讐精審皆時望所推鄙生亦  
夙相欽挹自當斂手退舍非敢以節讓鳴高區區之忱敢  
乞垂察奉謁在邇不罄欲宣光緒庚寅涂月

省方設教易垂觀象之文率屬興賢禮定飲賓之法書升  
宜論其秀筵羽可用爲儀故皮弁而執俎豆校士於上庠  
輶車而采歌謠陳風於太史所以奉宣德化攷察道藝典  
至重也粵稽肇郡宅惟南交爰逮嬴秦實長百越羲和平  
秩警教闢乎唐虞陸賈遠游文章耀乎楚漢其後蒼梧兼  
領交阯并隸縮轂兩粵屏藩二州川原秀麗上映台魁之  
躔邸舍縱橫中間都督之府嶺表奧區於是乎在若迥嵩  
臺峭嶸百神會觴之室爛柯縹緲羣德觀弈之地山名錦  
石采映峯巒寺號寶林香霏壇宇凡圖經所具載皆靈淑  
所特鍾賢岳挺生瓌奇輩出陳欽之習左氏別自名家士  
變之治春秋兼通大義或覃思訓故爲蔚宗之所服或耽  
玩注解爲承祚之所稱用能拔奇前修矜式來學使荒裔

之士散悅古籍潤色鴻業垂聲無窮至於楊孚異物之志  
范瑗先賢之傳交廣春秋王範之所上桂林風士休符之  
所述莫不敘次雅贍爲時宗工泊乎有唐厥緒益振何如  
瑛采珠合浦乃讀兵書莫仲節對策大廷尤嫺才藻功名  
奮乎千載科目盛乎一時若夫撰水城之記援筆卽成樓  
古寺之碑假燭無待則西海府君且延爲上客南宮進士  
爭詫爲奇才故事傳聞英流繼踵某官曾窺中秘久值承  
明賈生浮湘被一麾而出守謝客泛海踰五嶺而之官咨  
文獻於此邦緬風流於前史願與諸生商權執術折衷曩  
編異日貢之太學揚於

王廷校官弟子共肄鹿鳴之詩橫舍生徒咸通虎觀之論  
豈不懿歟諸生夙淹七略俱綜三長殺核典墳鉤稽邸寮  
或參攷荔譜艸木待其命名或拾遺硯林煙雲供其麾斥



續王化清石室之紀當勝於李邕摹趙令則龍母之碑定  
詳於吳揆某官一行作吏不廢嘯歌退食自公常耽披覽  
惟羞雷同之語且媿月旦之評想文史之足用牘奏東方  
期休沐之餘間樽開北海擲詞果富請酬一匹之縑隸事  
能工慙奪五花之簞

曼文二

五

